

千家诗·七言绝句

1. 春日偶成 程颢

云淡风轻近午天

傍花随柳过前川

时人不识余心乐

将谓偷闲学少年

2. 春日 朱熹

胜日寻芳泗水滨

无边光景一时新

等闲识得东风面

万紫千红总是春

3. 春宵 苏轼

春宵一刻值千金

花有清香月有阴

歌管楼台声细细

秋千院落夜沈沈

4. 城东早春 杨巨源

诗家清景在早春

绿柳才黄半未匀

若待上林花似锦

出门俱是看花人

5. 春夜 王安石

金炉香尽漏声残

剪剪轻风阵阵寒

春色恼人眠不得

月移花影上栏杆

6. 初春小雨 韩愈

天街小雨润如酥

草色遥看近却无

最是一年春好处

绝胜烟柳满皇都

7. 元日 王安石

爆竹声中一岁除

春风送暖入屠苏

千门万户曈曈日

总把新桃换旧符

8. 上元侍宴 苏轼

淡月疏星遶建章

仙风吹下御炉香

侍臣鹄立通明殿

一朵红云捧玉皇

9. 立春偶成 张 栻

律回岁晚冰霜少
春到人间草木知
便觉眼前生意满
东风吹水绿参差

10. 打球图 晁说之

阊阖千门万户开
三郎沈醉打球回
九龄已老韩休死
无复明朝谏疏来

11. 宫词 王 建

金殿当头紫阁重
仙人掌上玉芙蓉
太平天子朝元日
五色云车驾六龙

12. 宫词 林 洪

殿上袞衣明日月
砚中旗影动龙蛇
纵横礼乐三千字
独对丹墀日未斜

13. 咏华清宫 杜 常

行尽江南数十程
晓风残月入华清
朝元阁上西风急
都入长杨作雨声

14. 清平调词 李 白

云想衣裳花想容
春风拂槛露华浓
若非群玉山头见
会向瑶台月下逢

15. 题邸间壁 郑 谷

醲醑香梦怯春寒
翠掩重门燕子闲
敲断玉钗红烛冷
计程应说到常山

16. 绝句 杜 甫

两个黄鹂鸣翠柳
一行白鹭上青天
窗含西岭千秋雪
门泊东吴万里船

17. 海棠 苏轼

东风袅袅泛崇光
香雾空蒙月转廊
只恐夜深花睡去
故烧高烛照红妆

18. 清明 王禹偁

无花无酒过清明
兴味萧然似野僧
昨日邻家乞新火
晓窗分与读书灯

19. 清明 杜牧

清明时节雨纷纷
路上行人欲断魂
借问酒家何处有
牧童遥指杏花村

20. 社日 张演

鹅湖山下稻粱肥
豚栅鸡栖对掩扉
桑柘影斜春社散
家家扶得醉人归

21. 寒食 韩翃

春城无处不飞花
寒食东风御柳斜
日暮汉宫传蜡烛
轻烟散入五侯家

22. 江南春 杜牧

千里莺啼绿映红
水村山郭酒旗风
南朝四百八十寺
多少楼台烟雨中

23. 上高侍郎 高蟾

天上碧桃和露种
日边红杏倚云栽
芙蓉生在秋江上
不向东风怨未开

24. 绝句 僧志安

古木阴中系短篷
杖藜扶我过桥东
沾衣欲湿杏花雨
吹面不寒杨柳风

25. 游小园不值 叶绍翁

应嫌屐齿印苍苔
十扣柴扉九不开
春色满园关不住
一枝红杏出墙来

26. 客中行 李白

兰陵美酒郁金香
玉碗盛来琥珀光
但使主人能醉客
不知何处是家乡

27. 题屏 刘季孙

呢喃燕子语梁间
底事来惊梦里闲
说与旁人浑不解
杖藜携酒看芝山

28. 漫兴 杜甫

肠断春江欲尽头
杖藜徐步立芳洲
颠狂柳絮随风舞
轻薄桃花逐水流

29. 庆全庵桃花 谢枋得

寻得桃源好避秦
桃红又是一年春
花飞莫遣随流水
怕有渔郎来问津

30. 玄都观桃花 刘禹锡

紫陌红尘拂面来
无人不道看花回
玄都观里桃千树
尽是刘郎去后栽

31. 再游玄都观 刘禹锡

百亩庭中半是苔
桃花净尽菜花开
种桃道士归何处
前度刘郎今又来

32. 滁州西涧 韦应物

独怜幽草涧边生
上有黄鹂深树鸣
春潮带雨晚来急
野渡无人舟自横

33. 花影 苏 轼

重重叠叠上瑶台
几度呼童扫不开
刚被太阳收拾去
却教明月送将来

34. 北山 王安石

北山输绿涨横陂
直堑回塘滟滟时
细数落花因坐久
缓寻芳草得归迟

35. 湖上 徐元杰

花开红树乱莺啼
草长平湖白鹭飞
风日平和人意好
夕阳箫鼓几船归

36. 漫兴 杜 甫

糝径杨花铺白毡
点溪荷叶迭青钱
笋根稚子无人见
沙上鳧雏傍母眠

37. 春晴 王 驾

雨前初见花间蕊
雨后全无叶底花
蜂蝶纷纷过墙去
却疑春色在邻家

38. 春暮 曹 幽

门外无人问落花
绿阴冉冉遍天涯
林莺啼到无声处
青草池塘独听蛙

39. 落花 朱淑贞

连理枝头花正开
妒花风雨便相催
愿教青帝常为主
莫遣纷纷点翠苔

40. 春暮游小园 王 淇

一从梅粉褪残妆
涂抹新红上海棠
开到荼蘼花事了
丝丝天棘出莓墙

41. 莺梭 刘克庄

掷柳迁乔太有情
交交时作弄机声
洛阳三月花如锦
多少工夫织得成

42. 暮春即事 叶采

双双瓦雀行书案
点点杨花入砚池
闲坐小窗读周易
不知春去几多时

43. 登山 李涉

终日昏昏醉梦间
忽闻春尽强登山
因过竹院逢僧话
又得浮生半日闲

44. 蚕妇吟 谢枋得

子规啼彻四更时
起视蚕稠怕叶稀
不信楼头杨柳月
玉人歌舞未曾归

45. 晚春 韩愈

草木知春不久归
百般红紫斗芳菲
杨花榆荚无才思
惟解漫天作雪飞

46. 伤春 杨万里

准拟今春乐事浓
依然枉却一东风
年年不带看花眼
不是愁中即病中

47. 送春 王令

三月残花落更开
小檐日日燕飞来
子规夜半犹啼血
不信东风唤不回

48. 三月晦日送春 贾岛

三月正当三十日
春风别我苦吟身
共君今夜不须睡
未过晓钟犹是春

49. 客中初夏 司马光

四月清和雨乍晴
南山当户转分明
更无柳絮因风起
惟有葵花向日倾

50. 有约 赵师秀

黄梅时节家家雨
青草池塘处处蛙
有约不来过夜半
闲敲棋子落灯花

51. 初夏睡起 杨万里

梅子流酸溅齿牙
芭蕉分绿上窗纱
日长睡起无情思
闲看儿童捉柳花

52. 三衢道中 曾几

梅子黄时日日晴
小溪泛尽却山行
绿阴不减来时路
添得黄鹂四五声

53. 即景 朱素贞

竹摇清影罩幽窗
两两时禽噪夕阳
谢却海棠飞尽絮
困人天气日初长

54. 夏日 戴复古

乳鸭池塘水浅深
熟梅天气半晴阴
东园载酒西园醉
摘尽枇杷一树金

55. 晚楼闲坐 黄庭坚

四顾山光接水光
凭栏十里芰荷香
清风明月无人管
并作南来一味凉

56. 山居夏日 高骈

绿树浓阴夏日长
楼台倒影入池塘
水晶帘动微风起
满架蔷薇一院香

57. 田家 范成大

昼出耘田夜绩麻
村庄儿女各当家
童孙未解供耕织
也傍桑阴学种瓜

58. 村庄即事 范成大

绿遍山原白满川
子规声里雨如烟
乡村四月闲人少
纔了蚕桑又插田

59. 题榴花 韩愈

五月榴花照眼明
枝间时见子初成
可怜此地无车马
颠倒苍苔落绛英

60. 村晚 雷震

草满池塘水满陂
山衔落日浸寒漪
牧童归去横牛背
短笛无腔信口吹

61. 茅檐 王安石

茅檐常扫净无苔
花木成蹊手自栽
一水护田将绿绕
两山排闥送青来

62. 乌衣巷 刘禹锡

朱雀桥边野草花
乌衣巷口夕阳斜
旧时王谢堂前燕
飞入寻常百姓家

63. 送使安西 王维

渭城朝雨浥轻尘
客舍青青柳色新
劝君更尽一杯酒
西出阳关无故人

64. 题北谢碑 李白

一为迁客去长沙
西望长安不见家
黄鹤楼中吹玉笛
江城五月落梅花

65. 题淮南寺 程颢

南去北来休便休
白苹吹尽楚江秋
道人不是悲秋客
一任晚山相对愁

66. 秋月 程颢

清溪流过碧山头
空水澄鲜一色秋
隔断红尘三十里
白云红叶雨悠悠

67. 七夕 杨朴

未会牵牛意若何
须邀织女弄金梭
年年乞与人间巧
不道人间巧几多

68. 立秋 刘翰

乳鸦啼散玉屏空
一枕新凉一扇风
睡起秋声无觅处
满阶梧叶月明中

69. 七夕 杜牧

银烛秋光冷画屏
轻罗小扇扑流萤
天街夜色凉如水
卧看牵牛织女星

70. 中秋 杜牧

暮云收尽溢清寒
银汉无声转玉盘
此生此夜不长好
明月明年何处看

71. 江楼有感 赵嘏

独上江楼思渺然
月光如水水如天
同来望月人何在
风景依稀似去年

72. 西湖（题临安邸） 林升

山外青山楼外楼
西湖歌舞几时休
暖风熏得游人醉
直把杭州作汴州

73. 晓出净慈送林子方 杨万里

毕竟西湖六月中
风光不与四时同
接天莲叶无穷碧
映日荷花别样红

74. 饮湖上初晴后雨 苏轼

水光潋滟晴方好
山色空濛雨亦奇
欲把西湖比西子
淡妆浓抹总相宜

75. 入直 周必大

绿槐夹道集昏鸦
敕使传宣坐赐茶
归到玉堂清不寐
月钩初上紫薇花

76. 夏日登车盖亭 蔡确

纸屏石枕竹方床
手倦抛书午梦长
睡起莞然成独笑
数声渔笛在沧浪

77. 直玉堂作 洪咨夔

禁门深锁寂无哗
浓墨淋漓两相麻
唱彻五更天未晓
一墀月浸紫薇花

78. 寄王舍人竹楼 李嘉祐

傲吏身闲笑五侯
西江取竹起高楼
南风不用蒲葵扇
纱帽闲眠对水鸥

79. 直中书省 白居易

丝纶阁下文章静
钟鼓楼中刻漏长
独坐黄昏谁是伴
紫薇花对紫薇郎

80. 观书有感 朱熹

半亩方塘一鉴开
天光云影共徘徊
问渠那得清如许
为有源头活水来

81. 泛舟 朱熹

昨夜江边春水生
朦朧巨舰一毛轻
向来枉费推移力
此日中流自在行

82. 冷泉亭 林 稹

一泓清可沁诗脾
冷暖年来只自知
流出西湖载歌舞
回头不似在山时

83. 冬景 苏 轼

荷尽已无擎雨盖
菊残犹有傲霜枝
一年好景君须记
最是橙黄橘绿时

84. 枫桥夜泊 张 继

月落乌啼霜满天
江枫渔火对愁眠
姑苏城外寒山寺
夜半钟声到客船

85. 寒夜 杜 耒

寒夜客来茶当酒
竹炉汤沸火初红
寻常一样窗前月
纔有梅花便不同

86. 霜月 李商隐

初闻征雁已无蝉
百尺楼台水接天
青女素娥俱耐冷
月中霜里斗婵娟

87. 梅 王 淇

不受尘埃半点侵
竹篱茅舍自甘心
只因误识林和靖
惹得诗人说到今

88. 早春 白玉蟾

南枝纔放两三花
雪里吟香弄粉些
淡淡著烟浓著月
深深笼水浅笼沙

89. 雪梅 其一 卢梅坡

梅雪争春未肯降
骚人搁笔费评章
梅须逊雪三分白
雪却输梅一段香

90. 其二 卢梅坡

有梅无雪不精神
有雪无诗俗了人
日暮诗成天又雪
与梅并作十分春

91. 答钟弱翁 牧童

草铺横野六七里
笛弄晚风三四声
归来饱饭黄昏后
不脱蓑衣卧月明

92. 秦淮夜泊 杜牧

烟笼寒水月笼沙
夜泊秦淮近酒家
商女不知亡国恨
隔江犹唱后庭花

93. 归雁 钱起

潇湘何事等闲回
水碧沙明两岸苔
二十五弦弹夜月
不胜清怨却飞来

94. 题壁 无名氏

一团茅草乱蓬蓬
蓦地烧天蓦地空
争似满炉煨榾柮
漫腾腾地暖烘烘